

荆楚歲時記
真臘風土記
吳風錄

溪蠻叢笑
歲華紀麗譜
夷俗記

夷俗考
吳社編



吳

風

錄

黃省曾 著

中
華
書
局

叢書集成初編所
選學海類編百陵
學山皆收有此書
百陵本在先故據
以排印

吳風錄一卷

黃省曾勉之

自吳王闔廬造九曲路以遊姑胥之臺。臺上立春宵宮。爲長夜之飲。作天池。泛青龍舟。舟中盛致妓樂。日與西施爲嬉。白居易治吳。則與容滿蟬態輩十妓遊宿湖島。至今吳中士夫賽舡遊泛。攜妓登山。而虎丘則以太守胡纘宗創造。臺閣數重。增益勝眺。自是四時遊客無寥寂之日。寺如喧寺。妓女如雲。而它所則春初西山踏青。夏則泛觀荷蕩。秋則桂嶺九月登高。鼓吹沸川以往。

自吳王光僚骨肉戕殺。至今九族昆弟互謀交爭。鮮有親睦者。

自冉里披裘公季札范蠡輩前後潔身。歷世不絕。時時有高隱者。永樂中有王賓氏。

自漢蔡經居胥門。而王方平麻姑會于其室。魏伯陽作丹飛昇。楊羲陸脩靜輩入勾曲山學道。至今吳下好談神仙之術。然聲色汨之。卒皆無成。最下者造黃白僞金。謂之茅銀。用此欺購者衆。

自梁鴻由扶風。東方朔由厭次。梅福由壽春。戴逵由剡適吳國。人主之愛禮包容。至今四方之人多流寓于此。雖編輯爲諸生。亦無攻發之者。亦多亡命逃法之奸。託之醫卜羣術以求容焉。

自梁武帝好佛。大興塔寺。竺道生。虎丘聚石爲徒。講涅槃經。石皆首肯。支遁入道支硎山。海上浮二石像于開元寺。至今虎丘開元。每有方僧習禪。設會講二三月。郡中士女渾聚。至支硎觀音殿。供香不絕。

自六朝文士好嗜詞賦。二陸擷其英華。——國初四才子爲盛。至今髫髻童子。卽能言詞賦。村農學究。解作律賦。

自王謝支遁喜爲清談。至今士夫相聚。觴酒爲閒語終日。然多浮肅艷辭。不敦實幹務。

自梁王侃明三禮。孝經。論語。撰禮記講疏五十卷。論語義十卷。陳張冲撰春秋義喪服義三卷。孝經論語義十卷。隋褚暉撰禮疏一百卷。而陸元朗論撰尤多。至今吳人善著書。然善哀集文章雜事。無明疊篇實而通經者。

自吳曹弗興畫赤龍兵符圖。置龍水傍。應時雨足。張僧繇丹青絕代。而於金陵安樂寺畫四龍。點睛者飛去。張璪雙管爲生枝枯枿。入神品。滕昌佑花鳥。何克寫貌。至今吳人善畫者多。

自張弘善篆。張彭祖善隸。右軍每見其縑素尺牘。則藏之。張旭草書入神品。至今吳人善書。章草稱朱克能品。稱徐有貞。李應禎。吳寬而超入於晉者。惟祝允明得變化之妙。

自席謙善碁。石荊山善琴。呂彥直善雙鉤。張珙善刊錢。至今吳中多碁客。琴師雙鉤。然逐利而爲。無古人自得之妙。

自朱勔創以花石媚進。建節鉞。而太湖石一座。得銀碗千役夫。賜郎官金帶。石封爲盤固侯。壘爲艮嶽。至今吳中富豪競以湖石鉅峙奇峯陰洞。至諸農占據名島以鑿。鑿而嵌空妙絕。珍花異木。錯映闌圃。雖閭閻下戶。亦飾小小盆島爲玩。以此務爲鬻資。積金以克衆欲。而朱勔子孫居虎丘之麓。尙以種藝壘山爲

業游於王侯之門。俗呼爲花園子。其貧者歲時擔花鬻於吳城。而桑麻之事衰矣。

自蘇師旦以韓氏書史受諸將賄。至今吳人好遊託權要起家。永樂時附于權臣紀綱者。有陳湖陸氏。張氏。正德間附于閹人劉瑾者。有湯氏。家無擔石者。入仕二三年卽成鉅富。由是莫不以仕爲買。而求入學庠者。肯捐百金圖之。以大利在後也。陸家宰贖貨萬餘。以宸濠黨謫戍。陸太守營新宅甲吳中。今歸它人。天道雖不爽。而貪者尤甚。然持廉而不營產者。則目爲痴。其廉行最著者。御史陳祚。副使陳琦。郎中張璋。自元氏海運用海民。朱青張瑄。而瑄子文虎遂以戶部尙書領漕。取路大洋。旬日達于直沽。由是朱張二氏得以交通諸蕃貿易。占刈官蘆。販鹽行劫。第宅遍于吳中。瑄妾楊氏美而悍。別建第於乘魚橋。謂之四夫人府。後沒籍二氏。特立提舉司專典其金帛。至今吳人有通蕃求富者。並海崇明三沙姦民。多以行販鈔掠爲業。

自沈萬三秀好廣闢田宅。富累金玉。沿至于今。競以求富爲務。書生惟籍進身爲殖生階梯。鮮與國家効忠。

自顧阿瑛好蓄玩器書畫。亦南渡遺風也。至今吳俗權豪家好聚三代銅器。唐宋玉鐲器書畫。至有發掘古墓而求者。若陸完神品畫。累至千卷。王延詰三代銅器萬件。數倍於宣和博古圖所載。

自正德中。吳中古墓如城內梁朝公主墳。盤門外孫王陵。張士誠母墳。俱爲勢豪所發。獲其殉葬金玉古器萬萬計。開吳民發掘之端。其後西山九龍墳。凡葬後二三日間卽發掘之。取其歛衣與棺。傾其尸。

于土。蓋少久則墓有宿草。不可爲矣。所發之棺。則歸寄勢要家人店肆以賣。乃稍稍輯獲其狀。胡太守續宗發其事。罪者若干人。至今葬家不謹守者。間或遭之。

自曹太守嚮物於民。皆有鋪戶答應。十其入而一其酬。在昔已有曹平分。傳白奪之謠。至今郡縣剝鋪戶。嘉靖十二年。霸州王儀以御史來。則鋪戶一切革之。

自郡守徐親信吏胥。門隸往往成富人。至今爲隸胥。門隸者。酷以剝剋訟人爲事。而隸人之害爲尤甚。一人之正。十人之副。與吏胥因緣爲奸買票。出則橫行。動輒索數十金。其富而訟者。糧長之欲脫稽其逋者。所贈尤多。

自劉氏毛氏創起利端。爲鼓鑄國房。王氏債典。而大村名鎮必張開百貨之肆。以推管其利。而村鎮之負擔者俱困。由是累金百萬。至今吳中縉紳士夫。多以貨殖爲急。若京師官店六郭。開行債典與販鹽。其術倍剋於齊民。

自江右張鰲山提學來吳。廢七塔朱明二尼寺。以業宦室。胡太守又廢景德等寺。爲子游等祠。公館且往往餽贈勢顯。由是自城至於四郊及西山一帶。率爲權豪所奪。爲書院園圃墳墓。而吳之叢林無完者矣。至于黃縣令輩希效。則又盡撤古剎以贈權門貪夫。否則厚估其值。令釋道納之。大擾郡中。至今未已。自郭令信任鉅富。糧長納其贓賄千萬。以致糧長倍收人戶。吞併鄉民。莫之控訴。而糧長自用官銀買田造宅。置妾百費。則又閑坐于小戶。謬言其逋。至今糧長虎噬百姓。以率縣官。

目張士誠走卒。腐養皆受官爵。至今稱呼椎油作麵。備夫爲博士。剗工爲待詔。家人奴僕爲郎中。吏人爲相公。

目吳民劉永暉氏精造文具。自此吳人爭奇鬪巧。以治文具。行賂者。乃贈郡縣。故郡縣宦此者。爭索文具於民。若長州郭田二令。相繼挾千副以往。至今爲民害未已云。